




Mario Croes Jr.

UN **DEPORTISTA** CU A MARCA HISTORIA COMO HUNGADOR DI PING PONG

Pa Aruba y internacionalmente!

HOLA ARUBA a entrevista señor Mario Croes Jr., ken hunto cu su señora Ruth Croes-Arends a contesta nos preguntanan. Don Mario a nace na Oranjestad den e barío “Van Walbeekstraat” # 13, y den e mesun barío Ruth tambe a nace, na algun cuadra di distancia. Eynan nan a conoce otro den nan adolescencia, y despues di a formaliza un relacion nan a casa tempo cu nan tabata hopi hoben. Don Mario di 21 aña y sra. Ruth cu 19.

Di nan matrimonio a nace tres yiu: Janine, Mayoanchi y Medwin, y e familia a bira mas grandi ora e nietonan a bin acerca. Nan ta Rubencito, Marcus, Brandon y Mandrew. Masha bunita ta pa sa cu e feliz pareha aki ta bay cumpli e aña aki, na Juli, 42 aña di matrimonio.

UN TIKI STORIA:

Manera ta conoci, señor Mario Croes ta un deportista reconoci no solamente na Aruba, pero tambe mundialmente, pa su participacion den campeonatonan di ping pong unda el a yega di gana diferente campeonato tambe, lagando e nomber di Aruba na halto.

Di mucha don Mario a haci su enseñanza basico den Sint Dominicus College. Ora el a caba e school aki el a bay school tecnico, esta John F. Kennedy, pero e no a caba pasobra su tata, ken tabata doño di La Gran Bodega, a pidie pa e bin traha hunto cune.

“Mi tata, Jacinto Mario Croes (den feliz memoria) tabata e prome comerciante cu a habri negoshi na Aruba prome cu guerra. E tabata un hende hopi conoci na Aruba, ya cu ademá di negociante el a fungi como miembro di Staten na 1989.

Mi mester a laga school pa mi bay traha cune y te ainda mi ta sigui den e mundo di negoshi. Ta despues di mi tata otro comerciantenan a lanta nan negoshi”, sr. Croes a comenta.

Sr. Jacinto a establece su negoshi (La Gran Bodega) dia 27 di September di aña 1900. Kiermen e tin 106 aña bieu.

DEN E MUNDO DI PING PONG:

Na aña 1948 su pasion pa ping pong a nace, tempo cu e tabata tin apenas seis aña di edad. “Mi tabata hunga tur sorto di wega ora mi tabata mucha, pero un biaha mi a bay Flamingo Room, un bar cu tabata situa unda cu Sonesta ta awor, anto eynan mi a wak Tawa Irausquin ta hunga ping pong y e ora ey mi a gusta e wega ey. Pero mi a cumenza hunga e deporte aki di berdad cu seis aña, y mi a keda campeon di Aruba pa hopi aña largo”.

Su trayectoria como hungador di ping pong ta asina aki: Na aña 1948 el a cumenza hunga, manera nos a menciona caba. Na 1954, el a sali campeon hubenil di Aruba, na 1957: el a bira campeon di Aruba tempo cu e tabata tin 15 aña. Na 1959, cu 17 aña, el a participa den e prome torneo internacional na Curacao, tempo cu “Entre Nous Hubenil” a topa Colombia, y el a sa di gana tur Colombianonan, entre nan Dario Valencia cu a caba di sali subcampeon di e weganen Centro Americano y del Caribe, y na Aruba el a bolbe gana nan y a worde scogi pa “Entre Nous Hubenil” como

e mehor hungador di e torneo.

“Na aña 1963 mi a participa na e Campeonato Mundial na Praga, Checoslovakia, y tambe mi a participa den torneonan na diferente pais. Dia 14 di Maart 1966 mi a hunga contra Richard Bergmann y Lee Dal Joong, na 1967 contra Sportman van het Jaar di ASU cu 25 aña, y na 1973 mi a participa na AAA Nigeria cu e seleccion di Aruba, unda nos a sali number 18 entre 98 nacion di Africa, America y Asia”, don Mario Croes a relata.

Na 1981 el a sali e campeon individual na Caracas, Venezuela den e torneo internacional.

Na 1983 el a sali campeon di Antias y dia 12 di October 1999 el a sali campeon master di morneo internacional Dia de la Raza, na Valencia, Venezuela.

“Na 2004 mi a participa na e torneo di Kerstmis na Curacao y ganando tanto e master como e campeonato individual di Antias. Den su totalidad señor Mario Croes Jr., a hunga contra (y gana) Cuba, Puerto Rico, Venezuela, Trinidad, Jamaica, Guatemala, Mexico, Filipinas, U.S.A., Santo Domingo, Colombia, Curacao, Korea, Checoslovakia, Grenada, Barbados, Nigeria, Libano, Bonaire, entre otro.

El a bishita ademá di e paisnan menciona Bonaire, Trinidad y Tobago, Jamaica, Guayana, Alemania, y ainda e ta entrena cuatro biaha pa siman dos ora, pa tene e curpa den forma.

Señor Mario Croes a conta cu e tabata tin hopi perseverancia den su training, tempo e tabata mucha. E tabata entrena como cuatro pa cinco ora pa dia, y na dado momento nan a hera kite for di school pasobra e tabata falta les pa entrena.

El a menciona cu despues cu el a mira Tawa Irausquin hunga cu un otro persona yama Matthew, un hende di Trinidad cu tabata traha na Lago y tabata un bon hungador, y el a inspire tambe. E ora ey el a bay conta su mama ken a cumenza hunga cune, ya cu e dama aki tambe tabata hunga ping pong cu su casa, kiermen, don Mario a haya empuhe tambe di su mayornan.

CASA DEPORTIVO MARIO:

Don Mario a sigui cu e negoshi di su tata, te despues cu el a casa y su prome yiu a nace, cu el a dicidi di lanta “Mario Sport Shop” pa su familia biba di dje, ya cu el a pensa cu di un negoshi di familia no ta tur hende por sobrevivi.

“Ora mi a bay lanta mi cas di deporte, loke a sosode riba dia 15 di Juni 1984, mi señora a bay traha eyden cu mi yiu. E cu mi yiu grandi, cu awor ta na Hulanda, a bay traha prome y awor ami cu mi señora ta sigui cune”, don Mario a menciona.

ORDE VAN ORANJE-NASSAU:

Un di e momentonan mas emocionante pa don Mario Croes, su señora y nan familia ta ora cu el a worde condecora cu e “Orde van Oranje-Nassau” den Oro, lo cual a sosode riba dia 2 di April 1985. Y algo masha particular y bunita cu HOLA por a mira den su cas ta e cantidad di trofeonan, cu ta e testimonionan di su gran aporte na Aruba riba deporte di ping pong.

DOLOR Y SPERANZA:

El a comparti cu HOLA un episodio di dolor, speranza y amor, cu nan a pasa den nan bida. Como mayornan a haci nan hopi dolor, pero unda tambe nan a mira e man di Dios den recuperacion di un nieta.

Don Mario su yiu grandi a casa, manera ta natural, pero ora e cu su señora a haya nan prome yiu e mucha a nace cu hernia diafragmática.